

四庫全書

集部

欽定四庫全書

南澗甲乙稿卷六

宋 韓元吉 撰

五言絕句

遺直堂六首

蒿萊自興臺松桂猶伯叔便合追孔林無庸號寒木
虬龍舞雲端風雨來海上尚想堂中人詩成一迴向
苦心有深思勁質無軟語賢科廢因公此事亘千古

種木已如此高賢有餘思
賴公酷似舅其誰羨
牢之鄭虔骨已朽孔父天不遺
他年從事賢手板空倒持
棟梁乃不取得地且深植
妖嬈紫薇花歲晚猶伴直

夜宿斜溪聞杜鵑

解纜山銜日移舟雨暗溪
無情子規鳥夢斷隔林啼

送龐祐甫五首

燕鴻望南飛春至還北去
託食波浪中瀟湘幾回渡
遊子思故鄉天涯兩相逢
時平甘卹緯定交各塗窮

濯濯機中絲粲粲錦繡段自非心同人千金孰肯換
江湖多青山舟楫長往還山色難送客不如住山間
中宵權謳發孤蒲翳明月月黑君忽行恐墮蚊龍窟

六言絕句

題日出雨腳圖二首

絕壑春林映綠半山曉霧迷紅長憶西巖夢覺小舟欸
乃聲中

隱隱遙分樹色蕭蕭似聽風聲何處江傾海墮隔山霧

白煙明

次韻趙公直題米元暉畫軸

天際歸雲挾雨江干亂木藏山耳冷似聽蕭瑟眼明驚
見孱顏

七言絕句

春雪得小詩五首且約客登賞心亭

東牕坐愛枝間雪大似醪醖壓架花天氣更晴宜有月
夜深來看玉交加

淮南山色一千里
落水層城江更湍
何地江山有如許
與君聊趁雪中看

臘前未見梅如雪
春到還驚雪似梅
可是天公有情思
便令花樹一時開

江南絕景賞心亭
卧雪難尋舊畫屏
白鷺洲前夜來雪
故應此畫勝丹青

竹爐聽雪坐蒲團
長笑詩人不耐寒
未辨貂裘走南陌
肯來高處一憑欄

夜雪

爐水深紅蠟炬明
打牕風雪正縱橫
瓦瓶旋注山泉滿
卻作瀟瀟細雨聲

伴眼文書細作行
昏昏愁卧雪穿廊
何人恰弄風前笛
錯認梅花到枕傍

詠晴

愁眼東西萬里情
山雲斜度水風清
客行歲晚忽春盡
看到枯林綠葉成

春日書事五首

十年騎馬聽朝雞，老竊州符簿領迷。
衙鼓不聞春睡足，閉門聊喜得幽棲。

曉猿夜鶴寂無生，春至山禽百種鳴。
步繞新泉聊洗耳，

由來心與地俱清。

所居山下
得泉甚異

極目亭邊花定開，野棠山杏手親栽。
春風拂檻知何似，應記劉郎兩度來。

憶上金華第一峯，相君官重酒樽同。
夢尋絕壑誰重到，

零落山桃小院風

溪邊亂石蛟鼉卧煙裏千花錦繡圍記得年時作寒食

山橋吹笛雨中歸

山橋金華
山勝處

晨興

北牕松竹夜蕭騷詩就呼兒進濁醪睡美不知新雨足
曉來南澗水聲高

聽雨

呖軋籃輿不計肩五更殘夢尚悠然紅油蓋重聽朝雨

卻似西江坐釣船

題張幾仲所藏醉道士圖

何須坐客總能文呼酒相逢日暮雲醉倒儘如狂道士

夜歸誰問故將軍

幾仲移節稽山淳熙庚子歲除前一日會飲上饒傅舍觀圖戲書南澗翁韓某

無咎

浙江觀潮

江翻海涌勢難平
鼇擲鵬騫自不停
端為君王洗兵馬
參旗井鉞萬雷霆

太湖秋晚

片帆幾日下西風湖色秋容暮
靄中買得鱸魚弔張翰
卧聽欵乃度垂虹

海門斜照

雲夢懸知八九吞銀山萬疊漲天門
長江日落魚龍舞
古寺煙深鳥雀喧

武昌春色

樊山宮殿已成陳煙雨陰晴到處春
花柳不知興廢事

隔江相倚鬪時新

七夕

銀河翻浪拍空流
玉女停梭清露秋
天上一年真一日
人間風月自生愁

秋懷十首

朝行佛屋魚千里
暮借僧牀鷓一枝
牕下秋蟲解人意
似憐羈客伴哦詩

酒熟橙黃盛物華
重陽無客不思家
鵝兒剪雪開巖桂

鶴羽攢金散菊花

小雨驚秋滴夜闌
晴雲和日曉斑斑
誰憐客舍塵埃底
猶得西湖一兩山

何許砧聲清夢回
丁東猶作珮環猜
卷簾風露涼如水
端為嫦娥向此來

城外秋荷一半黃
尚餘疎柳照回塘
江南底許風光好
塞鴈來時未有霜

右手持杯左不空
蟹螯已作雪蒙茸
秋風莫起鱸魚夢

未似先生阿堵中

八月濤頭舊有名今年潮淺岸纔平應緣享帝千靈在
豫使魚龍不敢鳴

塞草初黃邊馬肥邊塵莫便向南飛江頭鶴唳秋風起
看取陰山六騎歸

江南四百八十寺未抵西湖勝處多不用樓臺帶煙雨
只看宮殿壓晴波

閉戶跣趺意已清爐香燒盡一燈明空庭葉落知多少

一任西風百種聲

聖政更新詔書正告訐之罪因得小詩十首

案通鑑續

編紹興二十五年十月秦檜死黜檜姻黨十一月
釋趙汾及李孟堅王之奇等自便十二月復張浚
胡寅張九成等二十九人官徙李光胡銓于近州
二十六年正月追復趙鼎鄭剛中等官此詩所謂
十年言路皆走黨雷州司戶卻生回
衛公精爽故依然皆記其事謹附識

惡復凶終事久知豈知聖斷不踰時小儒未歎周南滯
但喜逢人敢說詩

桓溫將死謝安起霍氏初除魏相來誰與聖君安大業

魏魏廊廟可無材

聖朝遂失誅元戴公議猶能去霍山落膽徒聞溫御史
不知睿意在羣奸

元祐諸公秉國鈞詔條先請惠吾民孤雛腐鼠何勞逐
準擬朝廷政事新

金貂七葉誰能必石櫛三年計自愚得鹿覆蕉真一夢
求魚緣木信狂圖

獻可爭先詆荆國瑩中居首論莆陽十年言路皆支黨

前無一語譏安昌

夫黨用
詔語

近聞羔鴈已成羣
藻鑿渠能涇渭分
急士且須侯雍齒
得賢端可吏朱雲

刺字幾漫冠欲塵
向來浮薄自紛紛
爾曹胸次多周孔
忍作銅山破賊文

荆棘誰令滿路栽
雷州司戶卻生回
獨憐陽陸真天命
不見永平公道開

潮陽初謫八千里
中令俄成十九年
地下修文應泚筆

衛公精爽故依然

卧病

有身自覺皆為患了事從來卻號癡
貧裏定知強健樂未妨斗酒百篇詩

夜宿青陽旅舍起觀林端積雪半消疑
山磬盛開風卷千林夜雪晴九華山下月微明
不須更覓唐昌藥樹樹瓏璵玉刻成

去草

永日荒園獨荷鋤草根藤蔓喜無餘
誰憐仲舉平生志
卻學齊民種樹書

偶興四首

桂花飄盡菊花黃
閑對芳叢靜愛香
堂下草深須一丈
會看春意滿池塘

小園無數菊花開
準擬花殘便見梅
不恨無花正無酒

敲門誰送一樽來

時有遠客惠酒

江南菊少開金色
只有霜葩雜御黃
乞得黃花真愛惜

明年賸種壓羣芳

愛水仙成百計栽三年一笑漸能開
金銀豈是吾家物

借我虛名付酒臺

世言水仙一
移三年乃開

市人有弄虎者兒輩請觀飼以豚蹄覩其攫噬戲

作四絕句

眈眈出柙小於菟猶意他年見
畫圖養汝由來得無患

卻驚赤手競編鬚

呀然一嘯朔風生
兒女窺簾笑且驚
檻內應憐只搖尾

山中不記舊橫行

長年肉食定何功
乞汝豚蹄且慰窮
猿臂將軍應老矣
南山忽憶夜彎弓

熒熒目色為生寒
蠻獠歌呼意自閒
莫倚便能探虎穴
勢卑還長越王炎

俸金既盡家人問
所質物戲答

十載棲遲榻具客
一生憔悴屨多歌
典衣不為沽春酒
平昔無詩博飯籬

讀周瑜傳

年來三十過平頭
笑卻周郎卻自羞
但得小喬歌一曲
未須辛苦向荊州

乘潮遇順風

忠信平生自可期
江神于我定相知
順風鼓棹潮如席
世事由來卻險巇

山行二首

晴日烘林百草香
杖藜徐步興何長
殘花的皜明幽徑

老笋參差出斷牆

春來南澗水初生
鷗鳥逢人自不驚
步繞幽花隨樹歇
望尋高柳趁隄行

行汴渠中

東海桑田未可期
隋河高岸已鋤犁
樓船錦纜知無地
枯柳黃塵但古隄

剡溪道中五首

擬賦歸田未有田
春風聊泛剡溪船
青山滿眼留儂住

處士茅茨阿那邊

戴家家住此溪頭買酒尋春得勝遊
夾岸楊花渾似雪不應興盡便回舟

平潮恰恰亂蛙鳴斷送江南春雨晴
綠縠細看桑眼破紫茸還見草心生

心隨天末江波遠愁似沙津柳帶長
向晚飛花度牆影半晴煙雨發山光

抱琴不作王門客晉代高風只此人
故老底須三上疏

竹林諸子未天真

隱靜山二首

乾道戊子七月旦日題

山鎖松行一逕遙
峰迴樓殿更岧嶢
飛來雙鷗知何處
只有泉聲下碧霄

海上蟠桃手自栽
紅塵一墮隔蓬萊
風帆弱水無由到
乞我當年渡海杯

狼山

天外奇峰認九華
路人指點是狼牙
他年刻石題車馬

會遣山前屬漢家

初見龜山塔

煙裏微茫第一山
眼明白塔俯滄灣
塵埃滿面三千里
一笑相看似夢間

山口道中

芳草連雲水拍溪
春山樹樹子規啼
東風何事催行客
偏遣殘紅趁馬啼

望靈壽致拜祖塋

白馬岡前眼漸開
黃龍府外首空回
慙慙父老如相識
只問天兵早晚來

宿石橋聞水聲

野橋曲折渡千回
古寺懸知水面開
一夜寒聲喧客枕
卻疑風雨轉山來

洞溪絕句三首

桃李欲開天雨雪
二月山城無柰寒
賴爾狐裘來送質
更須樽酒放愁寬

杏花無數連村落也有人家掛酒旗春色撩人只供醉
卻怕風吹易醒時

溪流直傍長堤去繚亂半山桃李花極知渡口好春色
卻下扁舟步晚沙

西湖絕句戲題

淺白深紅幾樹花波光浮動竹交斜怪來詩思清人骨
知是西湖處士家

流水當階山對門擬尋茅屋住荒村誰憐九里松間路

猶有人間市井喧

人道西湖一曲屏只應真色畫難成
柳隄竹塢無窮意更著荷花百媚生

渡河有感

袞袞河流到底黃誰言一葦便能杭
傷心擊楫無人會舉酒回頭酌太行

同翁子功之平江午憩涵山淨慈寺

蘋花吹盡藕花香日落風生水面涼
淨洗扁舟載明月

共君長嘯飲湖光

曇花亭供茶戲作二首

問訊高真此住家
伊蒲未辦且煎茶
故應一笑來迎我
五百瓶中總是花

一聲鍾磬有無中
樓閣山林本自空
不向雲端呈伎倆

猶來盞裏現神通

是夕始聞鍾聲
而金燈不現

夜宿玉虛宮小軒
正對步虛峯
道士云天寶三年
有慶雲見且山呼
萬歲始詔建黃帝祠
封為仙都

山敕書今亡

檻外風高霜月明
步虛山裏步虛聲
罷琴刻燭初長夜
又得人間一夢清

封禪空餘不死名
華清宮裏望長生
間雲強作人間瑞
更有山呼萬歲聲

龍虎驅馳戰阪泉
荆山鼎就更昇天
軒轅到處存遺跡
忍使君王不學仙

溪山堂次韻

溪岸人家高下居繞溪雲樹雜煙蕪故應曲水傳佳句
還喜青松入畫圖

又溪山堂次韻四首

堂前松竹挺千軍堂外青山萬馬羣橫策時來按文陣
要須筆力起風雲

澌澌溪光白鳥前昏昏雨腳暮雲邊一年風景君應記
五月來看競渡船

九衢塵土鬢毛蒼只有溪山意味長但得楓林供款乃

猶勝斗酒博伊涼

梅子青青杏子紅
繞城荷葉已掀風
莫嫌春盡無花柳
猶得清樽阿堵中

紫極觀二首

小雨輕雲卻解晴
菰蒲衝浪過船聲
已無桃李占春事
濃綠滿山風更清

楊柳花飛杏子新
園林無地可留春
卻尋風雨江邊路
慚愧煙霞物外人

漢光武廟

涿郡漁陽此路分
用兵諸將總如神
白頭浪說關中事
鄧禹當年已笑人

賀子忱抱膝庵二首

紫橐光華穩致身
會看功業上麒麟
文人久悞人間世
莫忘他年蕙帳春

紅覆薰籠錦不如
萬株相倚占春餘
小牕睡足花陰裏
何似天香下玉除

釣臺

璜溪亦有釣魚人
一笑鷹揚掃戰塵
不會先生辭漢祖
投竿深坐此江濱

答人問易

陰陽妙用表三才
卻問陰陽底許來
若識陰陽由動靜
何人更作有無猜

鐵鏡贈仲儼

石門江畔鴈山前
芥室遙知更豁然
百鍊精明真是鐵

不妨照破野狐禪

明老惠炭戲以二小詩

雪裏難逢送炭人
地爐炙手便生春
酸寒東野真堪笑
解道曲身成直身

道人作戲每逢場
一束烏薪發電光
便使樽前化紅袖
不妨笑殺許旌陽

訪吳元鼎如村五首

野竹漫山水漫門
未離城市卻如村
何須更問柴桑陌

三徑雖寒菊尚存

我住城南君在西柴門草長與人齊不妨共踏溪津路
日日雲山入杖藜

經旬泥潦路難乾煙裊長林雨暗山常笑詩人愁屋漏
卻思寒士與千間

昔年曾歎馬相如才氣飄飄賦子虛未怪家貧徒四壁
先生四壁儼人居

我生甲子幸君同君自臞仙我禿翁要拍銅鞮論歲月

莫嫌相對只詩窮

史十伯強浮沉市廛自號道人而筆力議論不可掩抑豈隱者耶觀其詩卷贈以絕句二首

未容君識得君詩添我幽栖一段奇會有吹噓天上去
沈香亭北要新詞

頭上塵冠豈易彈匣中長劍篋中丹放懷風月真餘事
好向朝廷策治安

次韻李平叔直舍竹二絕句

寒梢到地不肯屈迸筍出簷還作行故應餘韻占風月
要自勁節含冰霜

詩翁愛竹有佳句詩就移官可柰何密葉歲寒應更好
臘來和雪看婆婆

姜特立寄詩編為賦四首

十載文場未奏功鷗冠一笑且春容遙知橫槩荻蘆岸
海闊蛟鼉趕筆鋒

少年耽句千篇在老境忘言半偈無失喜因君還絕倒

但驚寒雀費隋珠

榕葉青青荔子紅
三山十寺粵王宮
誦君好句渾如畫
寄我清遊夢想中

宋景文為工學問
賀方回亦擅詩歌
半山人去東坡沒
妙墨空嗟楯上磨

重午齋宿讀蔡迥文編以酒饋之

長安米賤不難居
玉署金閨有直廬
指日君王嗟見晚
凌雲誰似馬相如

沈香亭上未傳宣，斗酒揮毫自百篇。
研雪新蒲甌弄碧，遙知獨酌意悠然。

九日送酒與朱元晦

平生愛酒陶元亮，曾繞東籬望白衣。
底事秋來猶止酒，重陽須插菊花歸。

老大相望寄一州，故人鄙我倦追遊。
應知命駕無千里，惆悵山堂暮雨秋。

航弟自廣潤省墳金華作二絕句送之

族緒彫零不計年戶曹一卷更蕭然恨無收斂冠巾計
送汝安心隱坐禪

烏玄鵠白從來事免角龜毛本自無日用不知何許是
漫言實相與空虛

送沈信臣赴試南宮五首

山城寒陟夜飛霜楓葉青紅帶夕陽夾道梅花有春色
不妨衝雪到錢塘

僕射吳興自世家迺翁勲業著金華似聞玉座詢名字

會伏青蒲掌白麻

共踏槐花記昔年一彎新月夜移船
君行為問靈泉水夢到松林石壁前

漫仕雖同官事殊故人來往未全疎
因君時一論文字難我窮年困簿書

吾謀不用可無人小技文章亦有神
一第區區兒戲耳請君折取桂為薪

次韻石林見貽絕句四首

平昔勲名步玉除，碧油幢下見懸車。定知他日平泉記，不數當年種樹書。

敢從州縣歎徒勞，斗米真成費束蒿。一醉石林巖下月，世間無復武陵桃。

青山白水對開簾，佳句中邊勝蜜甜。機杼由來千丈錦，區區割截笑江淹。

先生德業萬人雄，尋尺猶收爨下桐。乞與朱絃弄流水，坐聽巖壑起松風。

次韻沈明遠春盡書事

街槐園柳綠初連花盡春歸思黯然密葉鳴琴清夢斷
白雲雙眼暮山前

次韻子雲春日雜興五首

馬上還逢江上春冷煙和雨作紅塵不堪柳絮催行客
也有桃花似故人

鷓鴣鳴時春事空菰蒲葉小未成叢已拚江草無情綠
不柰山花恣意紅

瓦盆傾酒未全貧
歲歲田家肯負春
不恨酒醒花落去
花開酒盡最愁人

綠陰池沼亂鶯流
眼底春來鬢卻秋
不用黃金買白日
待尋三徑作歸休

山如眉綠畫新就
江似蒲萄始潑醅
收拾風光付佳句
此行嗟我未空回

又次韻子雲春日絕句三首

亂離誰意有新春
共醉春盤能幾人
但道沙場無匹馬

便驚羅綺總爭新

春來殘雪自消簷只有愁人鬢雪添未省雙鞬談豹略
且聽紅袖唱香奩

日月行天自漢家十年京洛恨無涯兒童不識鄉園事
競說江南春後花

次韻子雲寄楊仙姑酒絕句二首

海上冰漿冠八州舊傳仙姥下層樓一樽壓倒長安市
白墮青春未解愁

蒲萄底用博涼州有酒逢春更上樓
留取楊家風味客
對牀來此話離愁

次韻子雲中秋見寄二首

風雨經時憶對眠
秋聲愁絕鴈橫天
未應放卻西樓月
得酒寧須問聖賢

水繞孤城意自由
遠山無數鬱相繆
月明又作中秋好
白髮相望在兩州

次權歌韻

宛宛溪流九曲灣
山猿時下鳥關關
釣磯茶竈山中樂
大隱蒼屏日月閒

次韻趙文鼎同遊鵝石五首

繚繞雲山溪水南
溪光溶漾滴晴嵐
不知日暖花爭艷
但覺風和酒易酣

桃花臨水喚人看
花在嶙峋翠石間
莫惜持杯酬爛漫
更須持杖俯潺湲

長憶湖山天意新
詔恩大尹宴羣臣
休尋輦轂紛華夢

且作林泉自在人

澌澌煙波帶月華
渡頭江迴兩三家
細傾社甕鴉兒酒

共聽山村楊白花

是日社

幾年家住玉溪頭
乘興時來上釣舟
古寺幽情未曾到
尋春一為野僧留

入冬苦雨禱晴幸
應劉若訥惠詩為賀
因次其韻
雨餘雲杪澹踈星
老病窺簾眼自明
農事已知今歲好
天公賸放十分晴

酒難忘處能消日雨不愁時任戴星欲和新詩無好語
竹牕燈火夜晶熒

燈花作喜夜來占樓角初晴月似鑷便說市亭新酒美
好風寒日舞青帘

麥田秋過未休工襪橙如雲白雨中乞得晴明三十日
披襟可詠快哉風

次韻鄭守舜舉喜雪四首

好雪相仍歲又除豐年瑞事總堪書未嫌款段追千騎

化作張仙跨白驢

使君仙骨迥無儔
合上瓊樓倒玉舟
雪裏漁簑詩更好
盛傳僧舍與歌樓

銀似豪家沒柰何
玉成高壘更巍峩
殘年共擬看三白
酌我從今未厭多

湘吳醇酎愜兼衣
多病難禁玉笋飛
月下更期看國艷
凌波那更舞江妃

鄭守用前韻見示因亦和答四首

臘裏三看雪滿衢使君當奉十行書先生履敝人應笑
泥滑東家許借驢

九陌歌呼屬後遊一簷風景付漁舟相逢且向南溪看
玉作靈山萬石樓

振廩糜金氣自和政聲誰為勒嗟我牛羊壠上飢民絕
鵝鴨池邊勇士多

天巧由來不露機冰澌剪出萬花飛瓊瑤似識漢川女
瑤瑟更逢湘浦妃

次韻務觀城西書事二首

臘盡雪晴春欲柔
濛濛烟柳認瓜洲
潮生潮落無窮事
江水東西不限愁

川搖百艇陸千車
多是淮南避地家
黃紙赦來戎馬去
兒歌婦笑揔啞啞

次韻王季夷時同宿蔣山

北山應見太清年
興廢由來亦偶然
自我得之還自失
老禪刀尺尚相連

草堂一壑轉山腰杖策無因隱士招
蕙帳只應容我老
冷猿孤鶴夜寥寥

當年丞相讀書林誰識更張萬事心
籠上牛羊共回首
插天喬木暮陰陰

墨梅二首

西北佳人絕代姿傾城傾國未為奇
自然冰雪生顏色
不用人間朱粉施

影落寒塘月照時夢為蝴蝶繞高枝
畫工欲畫無窮意

不道幽人賸得知

栽梅

人將粧額半凌晨天與仙風自絕塵
歲晚相逢有如此為君傳取雪中真

暉仲惠梅花數枝

霜餘不用怨年華已有寒梅一兩花
眼冷故知春意動瓦餅終日看橫斜

莫問南枝與北枝幽香先與小春期
直從的皜寒梢數

看到飄零似雪時

江上春風幾日回一枝先傍小堂開
恨無冷艷連天白
已有生香特地來

贖買青春不費錢
眼明江靜月爭妍
詩人每負梅花債
屈指今年第一篇

蠟梅二首

白壁黃金取意裁
極知變態自江梅
風流一樣香仍好
共趁春前臘後開

未慙籬東染御黃
天香特地剪蜂房
應憐雪裏昭君怨
洗盡鉛華試佛粧

燕山道中見桃花

今日風橫車少塵
卷帷聊看塞垣春
已驚漠漠花經眼
也有濛濛絮撲人

去歲得黔江縣牡丹數種
今年開一枝蓋白者譜
中所謂水晶毬也

黔江新樣水晶毬
冰雪肌香體更柔
彈壓風光知第一

醪玉藥見應羞

汴都至南京食櫻桃

銀盤日日飽朱櫻
不負歸轅過兩京
身到江南梅未熟
故園風味夢闌情

以雙蓮戲韓子師

雨洗風梳兩鬪新
凌波微步襪生塵
真成紅玉嬌相倚
不減昭陽第一人

並舞連歌意態新
水晶宮裏向無塵
一時風月誰能許

要是君家兩玉人

種竹

香苞吹盡翠成圍
牆角蕭蕭一徑微
已喜軒牕無俗韻
更憐風月有清輝

謝陳秀才送詩

偶因借得官書讀
小札于君一向疎
忽寄江湖詩百紙
梅花擔上雪晴初

用梁士衡韻還鄧器先道中詩卷

夢繞江南雲水鄉
麻姑壇下月如霜
風光景色一千里
都在君家古錦囊

悼老瓊二首

歌舞相從六換年
秦箏已斷不能絃
荷花滿眼垂楊綠
腸斷清宵月正圓

江水東流湖水西
水邊花落夢回時
南屏山下風吹土
猶作蕭蕭暮雨垂

紙鳶

排風決起闌羣兒勢力由來一線微
天上鷓鷯徒似耳
卻驚遮日傍雲飛

廬山霽色

山北山南佛寺開
煙銷日出更崔嵬
讀書誰伴謫仙老
沽酒要須陶令來

靈隱冷泉

山涵水影兩空明
水到山前百尺清
洞裏臞仙應一笑
抱琴時為寫寒聲

南澗甲乙稿卷六

欽定四庫全書

集部

南澗甲乙稿卷七
九

詳校官庶吉士臣范逢恩

主事臣呂雲棟覆勘

總校官舉入臣程嘉謨

校對官編修臣吳舒惟

謄錄監生臣金際會

欽定四庫全書

南澗甲乙稿卷七

宋 韓元吉 撰

詞

點絳脣

十月
梅花

木落霜濃探春只道梅花未嫩紅相倚灼灼新粧膩
莫問仙源且問花前事休辭醉想君園裏總是生春地

浣溪沙

次韻曾吉
甫席上

南澗甲乙稿

莫惜清樽領客同已無花伴舞衣紅強歌歸去莫怱怱
細雨弄煙煙弄日斷雲粘水水粘空醅醪飛下晚來

風

霜天曉角

蛾眉亭

倚天絕壁直下江千尺天際兩蛾凝黛愁與恨幾時極
怒潮風正急酒醒聞塞笛試問謫仙何處青山外遠

煙碧

前調

夜飲武將家有歌霜天曉角者聲調淒婉戲為賦之

幾聲殘角月照梅花薄花下有人同醉風滿檻波明閣
夜寂香透幕酒深寒未著莫把玉肌相映愁花見也

羞落

菩薩蠻

青陽道中

春殘日日風和雨煙江目斷春無處山路有黃鸝背人
相喚飛解鞍宿酒醒歌枕殘香冷夢想小亭東薔薇
何似紅

前調

梅蠟

江南雪裏花如玉風流越樣新裝束恰恰纓金裳濃熏
百和香 分明離菊艷却作粗梅面無處柰君何一枝
春更多

前調

夜宿余家
樓聞笛聲

薄雲卷雨涼成陣雨晴陡覺荷香潤波影澹寒星水邊
燈火明 白蘋洲上路幾度來還去敲枕恨茫茫笛聲
依夜長

前調

鄭舜舉別
席有鴈

詔書昨夜先春到留公一共梅花笑青瑣鳳凰池十年
歸已遲 靈溪霜後水的清無比比似使君清要知
清更明

前調

春歸

牆根新笋看成竹青梅老盡櫻桃熟幽院幾多花落紅
成暮霞 閉門風又雨只道春歸去媚臉笑持盃却驚
春思回

前調

萊丞相園賞木
犀次韻于師

梧桐葉上秋蕭瑟畫欄桂樹攢金碧花底最風流相逢
不上樓 數枝添寶髻滴滴香霑袂杯到莫留殘霧牕
疑廣寒

減字木蘭花

雪中集
醉高樓

壺中春早剪刻工夫天自巧雨轉風斜吹作千林到處
花 瑤池清淺壁月瓊枝朝夢見莫上扁舟且醉仙家
白玉樓

前調

次韻
趙倅

風流雨洗玉闕瓊樓何處是萬里秋容喚起嫦娥酒未
中相逢且醉忙裏偷閑知有幾沉自豐年須信金華
別是天

訴衷情

木
犀

疎疎密密未開時裝點最繁枝分明占斷秋思一任曉
風吹金縷細翠綃垂畫欄西嫦娥也道一種幽香幾
處相宜

謁金門

春
雪

春尚淺誰把玉英裁剪儘道梅梢開未遍卷簾花滿院
樓上酒融歌暖樓下水平煙遠却似湧金門外見絮
飛波影亂

前調

午重

幽檻暑又是一年重午獵獵風蒲吹翠羽楚天梅熟雨
往事瀟湘南浦魂斷畫船簫鼓雙葉石榴紅半吐情
君聊寄與

好事近

辛卯安
席上

華屋翠雲深雲外晚山千疊眼底無窮春事對楊枝桃
葉老來沈醉為花狂霜髮未須鑷幾許夜闌清夢任
翻成蝴蝶

前調

鄭德興
家留飲

秋意滿芙蓉紅映小園叢竹風裏鳳簫聲颺有新粧明
玉詩翁相對兩悠然一醉繞黃菊目盡晚山橫處共
修眉爭綠

秦樓月

次韻陳
子象

鶯聲寂春風欲去難蹤跡難蹤跡幾枝紅藥萬金消得
青銅鏡裏朱欄側照人也似傾城色傾城色一樽莫
負賞心良夕

清平樂

辛丑重陽日劉守
拓飲石龍亭遊錄

危亭崛起卧蒼龍絕景畫圖中便作龍山高會千年樂
事能同使君晏處丹楓影淡黃菊香濃不惜歸鞍照
月直教破帽吹風

賀聖朝

送天
興

斜陽只向花梢駐似愁君西去清歌也便做陽關更朝
來風雨 佳人莫道一杯須近總眉峰偷聚明年歸詔
上鸞臺記別離難處

西江月

閨重陽

一度難逢佳節今年兩度重陽菊花猶折御衣黃莫惜
危亭更上 況有飛觴滌玉從教醉帽吹香興來相與
共清狂頻把新詞細唱

前調

春歸

山路冥冥雨暗溪橋陣陣花飛一年寂寂又春歸白髮
自驚塵世不諳障泥渡水且尋團扇題詩杜鵑休繞
暮煙啼我欲風前重醉

燕歸梁

木犀

涼月圓時翠帳深鎖非霧沈沈廣寒宮裏未歸人共結
屋住黃金繁枝未老秋光淡好風露總闌心天香不
奈遠相尋更剪巧上瑤簪

南柯子

次韻姚提點燕行
可席上見貽

急雨朝來過濃雲晚半收荷香便傍酒樽浮極目淡煙
斜照滿芳洲消盡人間暑翻成一段秋使星南楚轉
東甌只恐禁林歸詔未容留

前調

廣德道中
過重午

野杏搏枝熟戎葵抱葉開村村簫鼓畫船回客裏不知
時節又相催角黍堆冰椀兵符點翠釵去年今日共
傳杯應撚榴花獨立望歸來

浪淘沙

覺度
寺

席地賞殘紅少駐孤蓬一春不奈雨和風雨自無情風
有恨花片西東雲澹遠峰濃綠遍高桐神仙知在此
山中萬古消凝多少事目盡晴空

前調

趙富文
席上

倦客怕離歌春已無多閑愁須倩酒消磨風雨纔晴今
夜月不醉如何玉笋滌金荷情在雙蛾二年能得幾
經過花滿碧溪歸棹遠回首煙波

前調

芍藥

鷓鴣怨花殘誰道春闌多情紅芍待君看濃淡晚粧新
意態獨占西園風葉萬枝繁猶記平山五雲樓映玉
成盤二十四橋明月下誰凭朱欄

鷓鴣天

雪

山繞江城臘又殘朔風垂地雪成團莫將帶雨梨花認
且作臨風柳絮看煙杳渺路瀾漫千林猶待月爭寒
憑君細酌羔兒酒倚遍瓊樓十二欄

前調

九日雙
溪樓

不惜黃花插滿頭花應却為老人羞年年九日常拚醉
處處登高莫浪愁 酬美景駐清秋綠橙香嫩酒初浮
多情雨後雙溪水紅滿斜陽自在流

前調

九日登赤松絕頂

老去休驚節物催菊花端的為人開携壺幸有齊山客
懷古還如單父臺 松掩映水縈回使君強健得重來
不須細把茱萸看且盡豐年酒一杯

虞美人

送韓子師

西風斜日蘭皋路碧嶂連紅樹天公也自惜君行小雨
霏霏特地不成晴滿城桃李春來處我老君宜住莫
驚華髮笑相扶記取他年同姓兩尚書

前調

懷金華九日
寄葉丞相

登臨自古騷人事慘慄天涯意金華峰頂做重陽月地
千尋風裏萬枝香相君携客相應記幾處容狂醉雙
溪明月亂山青飛夢時時猶在最高亭

前調

夕

煙霄脈脈停機杼雙鵲飛來語踏歌聲轉玉鉤斜好是
滿天風路一池花離多會少從來有不似人間久歡
情誰道隔年遲須信仙家日月未多時

前調

葉夢錫園十
月海棠盛開

詔書昨夜催春到綠野花爭早幾枝先見海棠開全勝
隴頭春雪寄江梅破寒滴滴嬌如醉不比春饒睡萬
紅千紫莫嫌遲看取滿城花送袞衣歸

夜行船

再至東陽有歌于
住歲重九詞者

極目高亭橫遠岫，拂新晴、黛蛾依舊。策馬重來，秋光如畫，霜滿翠梧高柳。菊美橙香，還對酒、歡情似那時重。九樓上、清風溪頭明月，不道沈郎消瘦。

南鄉子

龍眼未聞有詩
詞者戲為賦之

江路木犀天，梨棗吹風樹樹懸。只道荔枝無驛使，依然贏得驪珠萬顆傳。香露滴芳鮮，並蒂連枝照綺筵。驚走梧桐雙睡鵲，應憐要底黃金作彈圓。

前調

中秋前一日
飲趙信申家

細雨弄中秋雨歇煙霄玉鏡流喚起佳人橫玉笛凝眸
收拾風光上小樓 爛醉判扶頭明日陰晴且漫愁二
十四橋何處是悠悠忍對嫦娥說舊遊

醉落魄

務觀席
上索賦

樓頭晚鼓佳人莫唱黃金縷良宵燈火還三五腸斷扁
舟明日江南去 離腸欲醉誰能許風前蝶鬧蜂兒舞
明年此夜知何處且插梅花同聽畫簷雨

前調

戊戌重陽
龍山會別

菊花又折今年真是龍山客
杯行澉灩新醅白一醉相
歡莫便話離別從教破帽頻
欹側樓頭霜樹明秋色
憑高待把踈星摘天近風清
不怕暮雲隔

一剪梅

葉夢錫
席上

竹裏踈枝總是梅
月白霜清猶未全開
相逢聊與著詩
催要趁金波滿泛金杯
多病慚非作賦才
醉到花前
探得春回明年公已在鸞臺
看取春風丹詔重來

臨江曲

次韻于
雲中秋

記得年時離別夜都門強半清秋今年想望只鄰州星
連南極動月滿大江流 芸閣老仙多妙語雲階清夢
曾遊屐聲還認庾公樓金波搖酒面河影隨簾鉤

前調

寄張
女國

自古文章賢太守江南只數蘇州而今太守更風流熏
香開畫閣迎月上西樓 見說宮粧高髻擁司空卻是
遨頭五湖莫便具扁舟玉堂紅藥在還勝百花洲

江神子

建安縣戲
趙德莊

十年此地看花時
醉題詩夜彈棋
湖海相逢曾共惜
芳菲前度劉郎今
度客嗟老矣鬢成絲
江梅吹盡柳橋西
雪紛飛畫船移
滿眼青山依舊帶
寒溪往事如雲無
處問雲外月也應知

前調

金山會飲

金銀樓閣認蓬萊
曉煙開上崔嵬
風引孤帆誰道却
船回鵬翼倚天鼈
背穩驚浪起雪成堆
翩翩黃鶴為誰來
醉持杯共徘徊
四面江聲脚底隱
晴雷織女機頭憑

借問何處更有瓊臺

滿江紅

丁亥示
龐祐甫

梅欲開時君欲去花誰同折應悵望江津千樹晚煙明
雪花似故人相見好人如塞鴈多離別待留君重看水
邊花花邊月 臺城路山如闕追往事傷時節但春風
春雨故人愁絕多少揚州詩興在直須春夢翻蝴蝶問
他年誰記飲中仙花應說

前調

自鹿田山橋小集潛菴
寺坐中酬陳子象詞

寂寞山城春已半，好花多折，無奈向陰晴不定，冷煙寒
食，莫問花殘，風又雨，且須爛醉酬春色，歎使君華髮又
重來人應識。丹井畔山橋側，空翠裏煙如織，便直教
馬上醉巾，霑濕丞相車茵，端未惜孟公好客，聊為客算
明年溪路海棠開，還相憶。

前調

再至丹陽，每懷務觀有歌其所製者，因用其韻，示王季夷、章冠之。

江繞層城重，樓迥依然，山色有佳人。猶記舊家離別，把
酒只如當日醉，揮毫賸欠樽前客。算平林有恨，寄傷心

煙如織 湖平樹花連陌風景是光陰易歎新聲渾在
斷雲難覓暮雨不成巫峽夢數峯還認湘波瑟但與君
同看小槽紅真珠滴

水調歌頭

席上次韻
王德和

世事不須問我老但宜仙南溪一曲獨對蒼翠與孱顏
月白風清長夏醉裏相逢林下欲辯已忘言無客問生
死有竹報平安 少年期功名事覓燕然如今憔悴蕭
蕭華髮抱塵編萬里蓬萊歸路一醉瑤臺風路因酒得

全天笑指雲階夢今夕是何年

前調

七月六日與范至能會飲垂虹是時至能赴枯蒼予以九江命造朝至能索賦

江路曉來雨殘暑夜全消人言天上今夕飛鵲漸成橋
杳杳雲車何處脉脉紅蕖香度瓜菓趁良宵推枕斷虹
卷撫檻白魚跳 五湖客臨風露倚蘭茗雲濤四起極
目人世有煙霄我送君舟西渡君望我帆南浦明日恨
迢迢且醉吳淞月重聽浙江潮

前調

寄陸務觀

明月照多景一話九經年故人何在依約蜀道倚青天
豪氣如今誰在賸對岷峨山水落紙起雲煙應有陽臺
女來壽隱中仙 相如賦王褒頌子雲玄蘭臺麟閣早
晚飛詔下甘泉夢繞神州歸路却趁雞鳴起舞餘事勒
燕然白首待君老同泛五湖船

前調

次韻子雲
惠山見寄

泚泚桂華滿搖落楚江秋去年今夜相望千里一扁舟
滿目都門風露離別淒涼幾度霜雪漸盈頭山水最佳

處常恨不同遊 少年約談笑事取封侯田園歸晚休
問適不用吾謀身外功名何處屈指如今老去無夢到
金甌賸買五湖月吹笛下滄州

前調

水洞

今日我重九莫負菊花開試尋高處携手躡屐上崔嵬
放目蒼巖千仞雲護曉霜成陣知我與君來古寺倚修
竹飛檻絕纖埃 笑談間風滿座酒盃仙人跨海休
問隨處是蓬萊

洞有仙骨巖

落日平原西望鼓角秋聲悲壯

戲馬但荒臺細把茱萸看一醉且徘徊

前調

兩花臺

澤國又秋晚天際有飛鴻中原何在極目千里暮雲重
今古長干橋下遺恨都隨流水西去幾時東斜日動歌
管萸萸舞西風江南岸淮南渡草連空石城潮落寂
寞煙樹鎖離宮且鬪樽前酒美莫問樓頭佳麗往事有
無中却笑東山老擁鼻與誰同

前調

和麗祐
甫見寄

落日澹芳草煙際一鷗浮西湖好處君去千里為誰留
坐想敬亭山下竹映一溪寒水飛蓋共追遊況有樽前
客相對兩詩流笑談間風滿座氣橫秋平生壯志長
嘯起舞看吳鉤紅白山花開謝半醉半醒時節春去子
規愁夢繞水西寺回首謝公樓

醉蓬萊

次韻張子永同
飲謝德興家

聽清歌初轉翠嶺雲橫乍飛還駐木落秋明正千巖呈
露沉有賓朋飄然才調盡凌空鶴鷺步繞西疇同尋南

湖郊原新雨 好客聲名鄭莊風韻松菊栽成故侯瓜
圓燕去鴻來笑人生離聚老子偷閑愛君三徑共一樽
芳醕待約梅仙他年丹就騎鯨飛去

念奴嬌

中秋携兒輩步月至
極目亭寄懷子雲兄

去年秋半正都門結束相將離別潏潏雙溪新鴈過重
見當時明月步轉高樓淒涼看鏡綠鬢紛成雪晚晴煙
樹傍人飛下紅葉 還記江浦潮生雲濤天際湧金波
一色千里相望渾似夢極目空山圍碧醉拍朱欄滿簷

丹桂細與姮娥說倚風孤嘯恍然身在瑤闕

前調

再用韻答
韓子師

定交最早歎西津幾度忽忽論別世事浮雲山萬變只
有滄江橫月長憶追隨湖山好處醉帽敬風雪竹陰花
徑興來題盡桐葉誰憶此地相逢鬢毛君未白眉添
黃色屈指煙霄歸詔近路入龍樓金碧千載功名一樽
歡笑會作他年說倚天長劍夜寒光透銀闕

前調

次陸務觀見
貽念奴嬌

湖山泥影弄晴絲目送天涯鴻鵠春水移船花似霧醉
裏題詩刻燭離別經年相逢猶健底恨光陰速壯懷渾
在浩然起舞相屬長記入洛聲名風流觴詠有蘭亭
修竹絕唱人間知不知零落金貂誰續北固煙鐘西州
雪岸且共杯中綠紫臺青瑣看君歸上羣玉

前調

又次
韻

春來離思正樓臺燈火香凝金戟揚子江頭嘶騎擁楊
柳花飛留客枚乘聲名謫仙風韻更賦長相憶酒闌相

顧起看月隨寒碧
樽前誰唱新詞
平林真有恨
寒煙如織
燕鴈橫空
梅蘂亂醉裏
隔江聞笛
白髮逢春
湖山好在
一笑千金
直待君歸
詔買船
重話疇昔

水龍吟

溪中有浣衣石

亂山深處
逢春斷魂
更入桃源路
雙雙翠羽
濺濺流水
濛濛香霧
花裏鶯啼
水邊人去
落紅無數
恨劉郎
鬢點星星
華髮空回首
傷春暮
寂寞雲間
洞戶
問當年
佳期何處
虹橋望斷
瓊樓深鎖
如今誰住
綠滿千巖
浣衣

石上倚風凝貯料多情好在也應笑我却忽忽去

前調

夜宿化城得張安國
長短句戲用其韻

五溪深鎖煙霞定知不是人間世軒然九老排雲一笑
蒼顏相對星斗垂空月華隨步酒醒無寐廣寒已近嫦娥
起舞舞天風動搖丹桂極目層霄如洗正千巖稜稜
霜氣飛泉半落蒼崖百仞珠翻玉碎金袖松成葛洪丹
就如今十載歎謫仙詩在騎驢未遠且留君醉

瑞鶴仙

送王季夷

西風吹暮雨正碧樹涼生送君南浦蟬聲帶殘暑滿高
林斜照暝煙橫渚故鄉路阻更秋入江城鴈度悵天涯
幾許閑愁對酒共成羈旅 休問功名何在綠鬢吳霜
素衣塵土離觴緩舉收玉筋聽金縷歎凌雲才調烏絲
欄上省把清詩漫與見洛陽年少交遊倩君寄語

薄倖

送安
伯弟

送君南浦對煙柳青青萬縷更滿眼殘紅吹盡葉底黃
鸝自語甚動人多少離情樓頭水澗山無數記竹裏題

詩花邊戴酒魂
斷江千春暮
都莫問功名事
白髮漸
星星如許任鷄鳴
起舞鄉關何在
憑高目盡孤鴻去
慢
留君住
趁醪醑香暖
持杯且醉
瑤臺露
相思記取愁絕
西牕夜雨

南澗甲乙稿卷七

欽定四庫全書

南澗甲乙稿卷八

宋 韓元吉 撰

表

賀冊寶禮成尊號表

天地明察昭舜孝之無違日月光華慶堯齡之有水鴻
稱大備喜氣橫流臣聞極天下以事親斯啟安榮之運
本人心而御治茲為仁壽之基洪惟慈闈膺萬歲之期

實繫聖君罷四海之化惟動丕應不顯其符隆大德必
得之名鏤彌文於寶誥紀秦元增受之策崇嘉號於法
宮恭惟皇帝陛下道際堪輿恩霑動植歡均海宇不遺
小國之臣禮盛天正亦尚一人之慶然而身濟大業躬
行至仁視膳問安匪徒區區曾閔之事勝殘去殺共推
赫赫禹湯之明是宜尼父之從心遂見周王之復古臣
屬嬰符竹阻望宸極帝夢無疆豈得同符於文武邦儀
曠舉真成度越于漢唐

賀太上皇帝表

九州致養坐凝景命之申七政呈祥運格宸心之縱光
增典冊慶溢家邦恭惟尊號陛下若聖與仁能寬而惠
功成白水邁建武三十二年道備崆峒陋廣成千二百
歲脫屣萬幾之重怡神五閔之餘宜膺睿算之無窮豈
視歷經而可紀神妃儷極共披金匱之書聖子當陽長
奉玉卮之壽臣屬居職守阻造闕庭帝堯蕩蕩以難名
第切康衢之頌周王勉勉而壽考彌瞻雲漢之章

賀太上八十受尊號冊皇帝表

臣某言伏覩詔書加上光克壽聖憲天體道性仁誠德
經文緯武紹業興統明謨盛烈太上皇帝壽聖齊明廣
慈備德太上皇后尊號冊寶者玉卮稱壽儼二紀之升
平寶冊增名伸兩宮之大慶禮嚴八秩歡動九圍臣聞
惟舜事堯斯啟髦期之社若文與武式彰夢帝之祥考
載籍之攸傳厯漢唐而未覩於昭聖代肆舉上儀一生
二二生三肇炎緒之符於有永萬取千千取百廸慈闈

之莫於無疆一時並上於鴻稱嗣歲咸新於縟典恭惟
皇帝陛下系隆本始德邁永平涖中國而撫四夷將整
渭橋之駕坐明堂而朝羣后益表雲臺之功而乃襲龍
袞以下同老萊之衣調神鼎而躬致天下之養亶為盛
事彌介萬年臣屬領真祠阻趨觀闕福延宗社久知上
帝之顧歆惠及昆蟲更納斯民於仁壽

賀太上皇帝尊號表

臣某言伏覩詔書皇帝帥羣臣詣德壽宮

案宋史高宗稱德壽宮

加上光堯聖壽憲天體道性仁誠德經文緯武紹業興
統明謨盛烈太上皇帝尊號者膺受命之符久熙神于
物外增泰元之策爰加號於域中掩載籍以彌高洽華
夷而共慶竊以期頤在宥自堯舜而有聞壽考逾中歷
漢唐而未見况脫屣而安天下之養垂衣而與造物者
遊王則次春御常珍于閏歲孫又有子貽丕緒於本支
斯惟無得而名是為必得其壽恭惟光堯壽聖憲天體
道性仁誠德經文緯武紹業興統明謨盛烈太上皇帝

陛下好生本天地之大德寢兵成帝王之極功三十六
年躬行慈儉之寶萬有千歲力致太平之基宜典冊之
屢書與皇圖而俱永臣欽奉盛際屬領外祠九賓臚傳
雖莫奏甘泉之頌百神率舞第惟伸嵩嶽之呼

會慶節賀表

良月就盈夙啟誕彌之旦五星來聚聿迎元命之年宗
社騰輝華夷協慶恭惟皇帝陛下恩沾動植道貫堪輿
體虞舜之無為懋介兩宮之祉秉周文之至德益深四

表之歡策增授于泰元禮獨行於昭曠本支百世已觀
孫子之施壽考萬年將見帝王之冠臣久叨祠館阻造
闕廷六樂成儀莫預鈞天之宴九賓在望第聞嵩嶽之
呼

聖神出震凝寶命於昊天厯數紹堯啟昌辰于良月乾
坤薦祉夷夏騰歡恭惟皇帝陛下大德好生休功不殺
孝悌而光四海恭儉以屏五兵治格文明將繼六經而
七祥開壽嘏允膺萬歲之三臣屬領祠廷阻趨觀闕雖

田穀之仰膏雨莫謝于生成若澤葵之傾太陽彌深于
頌禱

神聖健生昭格熙平之運乾坤錫羨式彰震夙之辰海
嶽騰歡華戎共慶恭惟皇帝陛下明並日月功光祖宗
整法駕于園丘彌文嗣舉奉慶儀于前殿載藉未聞舊
傳河水之清茲見壽星之會臣屬叨祠館遙睇闕廷莫
陪嵩嶽之呼恭趨盛旦第切華封之祝益介萬年
千齡啟運於昭上聖之生萬歲成純式副下民之禱昆

蟲愷澤海嶽歡呼恭惟皇帝陛下勇知表邦寬仁御世
體乾元之用九萬化默成法離昭之繼明四方咸又候
祥輝于良月增神英以後天臣屬假麾符阻趨觀闕續
天地之頌莫追考父之能廢立極之謠第切封人之願
生商定位仰神聖之挺生日月光華驗基圖之復旦四
方來賀萬國咸寧恭惟皇帝陛下陟禹之迹誦堯之言
通考悌於神明惟動丕應成安強于道德未占有孚載
臨震夙之辰益著升平之象體太極之三為一功即混

于華戔膺眉壽之萬有千治彌高于今古臣猥叨祠秩
阻造庭紳擊壤歡呼第切康衢之頌稱觴忭舞如聞嵩
嶽之呼

昊天成命有開載夙之祥良月就盈益仰誕彌之節照
臨所被鼓舞惟均恭惟皇帝陛下勇智以表萬邦神明
而光四海政刑修於閒暇丕昭有截之威道德成乎安
強共介無疆之壽茂建系隆之業聿臻恢復之期臣徒
深望日之誠莫預造庭之慶紹登封之七十一俯觀世

祖之成功膺歷數之萬八千仰繼天皇之盛際

占履武之祥序開良月紀流虹之旦慶及溥天莫酬在
宥之恩共上無疆之祝恭惟皇帝陛下丕承武烈重協
帝華修車馬以會東都聖功可待詰戎兵而陟禹迹德
政用修洽四表之歡聲介萬齡之眉壽臣屬拘祠館阻
造宸廷奉百末之觴魚龍在望上千秋之鑑葵藿傾心
祥開良月占五星聚井之期慶決寰區啟大電繞樞之
旦乾坤丕應宗社延洪恭惟皇帝陛下睿智以有臨常

德以立武會期長樂聿求萬國之歡獻獲大安坐式九
圍之命懋建隆平之業於昭震夙之辰合二氣於無窮
凋三光而不老臣叨塵從橐久去宸筵履土戴天莫罄
華封之祝望雲就日第增嵩嶽之呼

天申節賀表

按宋史高宗生
辰名天申節

紹炎圖于三紀久釋萬機嚴端節于千秋茂迎八秩祥
占嵩嶽喜溢康衢恭惟尊號德輔至仁功高再造怡神
物外自得逍遙之遊玩意域中不遺慈儉之寶仰聖子

神孫之共慶宜普天率土以均歡臣屬領真祠阻趨觀
闕候如復旦驗神光七十五來禮盛祈年頌眉壽萬有
千歲

中天紹復漢儀莫甚於兩京垂拱耄期堯壽特高于五
帝祥占星火喜溢康衢恭惟尊號道大難名功成不處
丕謨與子無憂宣惟文王好生在民盛德孰加虞舜脫
履萬機之外怡神四海之尊八千歲為春坐葆河清之
運九萬里而上行觀輿地之歸臣久去班聯尚庶祠秩

仰房心之叶瑞莫遂窺瞻驗箕翼之齊輝第深忭舞
九州致養仰太極以居尊四表騰歡慶誕彌之紀節恭
惟尊號功成不宰道妙難名跡並商周茂建中興之烈
粃視堯舜獨全高蹈之風椿齡迎八秩之祥天壽啟萬
年之永臣叨塵從橐阻造宸筵驗火德之重明徒深獸
舞祝乾符之增授第切嵩呼

道契崆峒甫迪期頤之慶光凝華渚式昭載夙之祥燕
及敷天歡騰萬國恭惟尊號功高漢祖神並唐堯踰建

武三十二年授之聖子迎天皇萬八千歲重見神孫倬
然壽考之符信矣古今之寇臣屬拘祠秩阻造闕廷出
丙入丁共仰星躔之極先庚後甲益知帝命之申

天命不顯其符久格系隆之運大德必得其壽式昭震
夙之辰夷夏均歡人神共慶恭惟尊號功超邃古治復
承平再造丕基陋漢唐其培塿允恭大業儼堯舜猶糝
糠方觀累洽以重熙自得長生而久視後乾坤而不老
膺厯數以無窮臣猥竊真祠阻趨宸陛仰鎬京之燕惟

深葵藿之傾聯嵩嶽之呼第切昆蟲之懌

進銀絹表

萬機脫屣仰崆峒訪道之辰四海貢珍盛華渚呈祥之
旦虔修方物恭寘大庭前件銀絹美異昆田寔諸文篚
不腆敝賦敢為宰菴之歸無疆惟休共上封人之祝

賀太上皇帝表

堯舜在上紹成復古之勲任如比隆共格齊天之算禮
新一代慶洽萬方竊以日候再中故月承而有耀乾元

用九茲坤順以無疆仰泰皇迎增壽之祥乃柔極兆同
休之慶道均不老理合自然恭惟尊號太上皇帝陛下
脫履怡神握符御世文王之與聖子既共保于鴻基帝
嚳之有元妃宜並申于寶命肆差春旦繼舉盛儀靡煩
八駿之馳坐致七桃之獻臣屬嬰祠秩久去宸筵聽九
成之簫韶第想雲龍之會祝萬歲之眉壽徒殫葵藿之

誠

太上皇帝慶壽禮成賀表

慈闈介壽亘古未聞盛禮告成普天同慶恭惟尊號太
上皇帝陛下仁參高厚道冒華戎克遜成功父子自侔
于堯舜系隆底豫君臣未數于商周茲屬萬歲之期翕
受四方之賀啟祥輝于南極候淑氣于東郊不踰矩以
從心既驗降年之有永強為名而字道益知受命之無
疆臣屬守蕃宣阻趨象魏歌鄉雲之爛備聞海岳之歡
受神筮之增更仰日星之紀

皇帝賀表

慶集堯庾仰聖人之得壽禮行漢殿知天子之有尊宗
社增輝華夷受福恭惟皇帝陛下守先王之要道備中
國之至仁法地法天叶寧神于無外盡倫盡制極養志
而不違當慈闈膺獻歲之祥實睿算擬傳家之喜占斗
牛之王氣盛事冠于百王會日月于壽星歡聲騰乎四
表臣適叨郡寄阻望國光莫陪洛下諸生作受命中興
之頌尚與海隅父老詠蒸民立極之詩

太上皇后七十賀皇帝表

千齡紀運式昭帝載之隆七秩迎年更上母儀之慶歡
騰海宇喜溢公庭竊以漢興而尊太公媪后不書於長
樂竟老而授大舜女皇莫著于平陽惟一時並養于神
闈且二聖聯躋于睿算在今罕見亘古未聞恭惟皇帝
陛下齊日月之運行事天地以明察垂衣拱手而致化
道當合于兩儀問安視膳于無違教既行于四海金簡
同開于壽厯玉卮益奉于慈顏臣逖遠從班欽聆盛典
宴西池而歌黃竹小融融洩洩之詩禮南嶽而倡卿雲

美蕩蕩巍巍之治

孝慈淵聖皇帝上僊慰表

代念司

佳兵罷警方期鑿輅之還遠使來庭遽告龍髯之斷哀
纏宸極痛決窠區伏以孝慈淵聖皇帝潛德春宮天下
陰受其賜承休寶位生民無得而稱蓋仁孝本于自然
慈儉存于先務蒙塵三紀阻覲萬方合文王之明夷固
已行乎患難有高宗之無逸曾未享于春秋恭惟皇帝
陛下坐致平康躬修悌順東朝違養纒歲月之僅周北

顧在原何禍災之荐至音容遂邈聖情難居臣適以使
事在遠不獲奔赴闕庭云云

太上皇帝慰表

中壺貽災遽失婦容之順慈闈軫念諒同子聖之悲恭
惟光堯壽聖太上皇帝陛下脫屣萬機頤神四表雖自
家刑國宜俯記于內朝而制禮緣情願稍寬于聖慮

太上皇后慰表

母道遵臨方嚴慶養婦儀奄隔遽軫慈懷恭惟壽聖太

上皇后殿下厚德承乾至明儷日顧徽音之欲嗣悵柔
範之莫違願寬中節之哀以副從宜之禮

皇帝慰表

為皇后
上仙

災延椒掖悲動楓宸凡在照臨舉深愴慕伏以大行皇
后化行恭儉德茂柔嘉正九御之盛儀悵焉未久助兩
宮之大養脩爾不終恭惟皇帝陛下治極寧親功深御
宇願仰覩天之感俯從率土之祈

又 為皇太
子薨

前星失次少海沈輝痛極本支悲纏寰宇恭惟皇帝陛下治功日起齒德天開宮掩長秋顧哀悼之未遠苑空博望乃變故之荐臻願思付託之隆少抑哀慈之念

太上皇帝慰表

國有神孫方啟重輝之盛天開聖緒乃貽大本之憂恭惟尊號備王者之無私膺天下之至養甲觀占夢茂迎四世之祥綠車在廷遽有一朝之感願益觀于道化庶少抑于聖情

太上皇后慰表

主器占憂遂虛儲禁含飴興起倍軫慈哀恭惟尊號體
備仁榮躬徐儉實眷此重明之照夙昭大慶之符帝祉
未施天災遽有願抑悲思之感益綏壽履之康

知婺州到任謝表

入塵法從歲躔恍閱于再周出假便蕃道路僅更於數
舍仰體曲成之眷敬宣寬大之恩伏念臣知力不能踰
人學術無以異衆才疎意拙少嘗粗志于功名心折氣

推晚實重傷于憂患宜謂衰頹之朽質寢蒙特達之聖
知始寓直于掖垣旋參華于選部文惟骫骳屢承褒袞
之加議本慙愚悉荷威顏之假感洪慈之未報揣微分
而敢安顧此東陽今為輔郡財殫粟匱適遭饑饉之餘
訟劇政繁尤重藩宣之委孰云孱懦可副選掄此蓋恭
遇皇帝陛下躬慈儉以保邦體寬仁而御下謂臣早更
州縣或知撫字之勞憐臣久待禁嚴備識憂勤之意責
之列職寵以分符敢效昔賢樽俎但期于賦詠庶幾漢

吏里閭稍遂于莫安

再知婺州到任謝表

冠西清之美職已冒殊恩分太末之名邦仍叨舊治稍
違行闕即居部封伏念臣少嘗竊慕於古人晚始親逢
于聖主豈謂迂疎之質遂蒙特達之知造膝而貢狂愚
既屢嘉其一得披肝而導志慮曾何補於萬分罔知歲
月之遷寢荷寵靈之異昨膺召節誤長從班孰云銓敘
之平益愧論思之謬葵藿徒知向日忍負寸心犬馬猶

有懲軒敢懷去意第每虞於譏議仍滋懼於滿盈自說
為州實難報上况茲寶婺特近太微地竊重臨治行靡
追於黃霸時容著詠郊居肯慕于沈侯祇佩眷私若為
稱塞此蓋恭遇皇帝陛下德參天地道冒華戎泰和在
于唐虞肅臣工而器使仁風慰於黎庶擇守命以布宣
施及妾庸荐加優渥臣敢不恪求民瘼寅奉藩條官聯
喉舌之司顧敢忘於左右郡亦股肱之寄誓益告于謀

猷

謝賜寬恤手詔碑表

宸恩寬大衣被於羣黎睿藻昭回照臨于萬寓承休甚
寵拜命惟新竊以方國賜書本建武中興之盛事為民
下詔實孝文務養之深仁於鑠聖時兼休二代恭惟皇
帝陛下道侔天地德紹祖宗功烈無前孝治歡騰于四
表嘉祥荐至豐年屢格於萬邦憫茲穀賤之或傷尚致
戶輸之過取賜頒寶墨申戒攸司粲然雲漢之垂穆若
春陽之布臣濫紆州組躬受詔函周賦有常詎敢多于

什一堯言在上庸知告以再三

辭知建寧府表

右臣准尚書省劄子十二月三日三省同奉聖旨差臣
知建寧府不候授告疾速前去之任候任滿前來奏事
者臣欽聞成命愧懼無任伏念臣以至愚極陋之質荷
上聖特達之知擢寘三銓已乏論思之效試守一郡迄
無善最之稱徒知奉行寬大以拊摩饑饉之餘不慮自
貽曠深而招致悔尤之積懇祈散地實微分之攸宜以

界便藩匪私心之敢望況建寧之鉅鎮本潛躍之名區
雖異時嘗叨宰字之官豈今日遂有鎮臨之幸已試無
狀啟處不違伏望皇帝陛下遴選循良布宣德意俾內
外咸舉其職思小大務盡其才寵以真祠庶少安于庸
懦假之歲月斯曲示于保全臣無任瞻天望聖激切屏
營之至所有恩命未敢祇受臣除已交割婺州職事已
與次官一面起離前去衢信州聽候指揮外謹錄奏聞
伏候敕旨

知建寧府到任表

瀝懇籲天莫遂請閒之願疏恩易地仍叨共理之榮優
假至深凌競罔措伏念臣奮身疎遠遭世盛明入參侍
從之華每蒙異眷出領藩宣之寄曾乏微庸况歲月之
僅周積過愆而靡追孤踪易毀寧分近甸之憂全度兼
容特畀潛藩之重眷茲建水實控閩陬代籍初基覺豁
山之改觀宦遊寢老慨民社之常臨雖馳驅頗愧于壯
年然委付有光于前日此蓋恭遇皇帝陛下惠綏羣獻

金少口八十三
卷八
明燭高微器使人才舉絕重輕之弊衡持天下悉無內
外之殊不遺管蒯之微尚費乾坤之造軫其迂鈍錫以
便安臣敢不仰體曲成益思盡瘁土風末俗猶粗識其
二三利澤深仁或布宣于萬一

謝降官表

外臺撫戾難挽于深文中詔施仁第從于寬典恩隆命
薄感極涕零伏念臣猥以庸才叨塵輔郡野無青草適
歲事之荐饑戶有屨渠復土風之善競慨疲駕之既竭

慚尺寸之圖功財貨未贏陽城之政甚拙教條靡善延
壽之過自知至於報應或謬于文移請讞務伸于法令
重貽刺舉宜在謹訶羸瓶之寘并涓蓋有擠而甚者弊
車之避道左是宜麾而去之敢期覆幬之深曲示保全
之厚就移職守特損官聯此蓋恭遇皇帝陛下湯網務
寬舜璣惟察念臣久更州縣常自信其迂愚憐臣昔侍
禁嚴每洞知其拙直刑于善貸責以後來臣敢不仰副
殊私益堅素履雖桑榆之收暮景莫知補報之方若蒙

藿之傾太陽尚有糜捐之所

謝放罷表

彈文甚峻請從流放之科宸度兼容聊示沃歸之譴恩
深命薄感激涕零伏念臣猥以非才叨塵異眷文詞淺
拙嘗蒙甚善之褒議論濶疎屢動益高之聽久冒清華
之選皆繇特達之知昨自典銓復求試郡與之舊治曾
無數舍之勞課以字民尚乏期年之效徒以世霑厚祿
身忝從班稍知粗抑於豪強不敢遽形于退避明目張

騰期法令之是行銷骨鑠金乃謗傷之遂積果貽清議
上負明時然臣被拔擢于州縣者餘二十年苟委任于
朝廷者更十數職寵為過分嗟有識之自知貪以徇私
慨無從而可辨儻匪皇慈之洞鑒詎容小己之保全茲
蓋恭遇皇帝陛下擴博愛之深仁推好生之盛德惟天
為大徧覆包涵而靡遺如日之升遠近幽深而必照察
臣性本于疎直憐臣夙厲於樸忠不忍嚴誅尚存善貸
臣敢不洗心念舊銘骨知歸迫暮景之桑榆若為報國

視歲寒之松柏所以事君

謝提舉太平興國宮表

竊輔郡之符自貽謗戾賦真庭之祿俾追飢寒滋佩思
憐徒深感涕臣某臣惶誠恐頓首頓首伏念臣學知為
已仕切慕君荷聖神識拔于衆人之中遭逢特異躡侍
從周旋于六官之表忌嫉已多惟思樸直以盡忠詎敢
窺覲而倖進竭因請外復玷承流謂抑強禁暴者刺史
之常規若避事懷私者古人之深恥豈慮中傷之銖積

遂能搖動于風聞含沙幾類于短狐射市乃遭于强弩
誣其怨望固已墜臣于深淵蠱以貪汚直欲鉤臣于聖
世賴至仁之在上知羣下之隱情洞見肺肝保全軀命
然臣恐懼閱三時之久羈窮懷十口之憂未容放跡于
山林但有投誠于君父函蒙鴻造肆軫餘生庶廩稍于
安閒貸馳驅于衰病茲益恭遇皇帝陛下曲成萬物懷
保小民力辨忠邪益恢張于治具大明黜陟庸丕變于
士風將尋尺之有施示益幃之罔棄察其既往許以自

新臣敢不砥礪素衷激昂晚節無功而祿第為餬口之
羞有命不渝尚切粉身之報

再任興國宮謝表

綴西清學士之班尚叨美職賦南紀祠官之祿益愧罔
功祇荷恩憐莫知報塞伏念臣才為短拙分實羈單圭
竇華門竊有棲遲之幸竹筍木屐自嗟嫁送之頻顧榮
遇之已多曾生涯之未給一昨坐謾于郡寄繼蒙予食
于真遊抱詩禮以傳家詎忘所守課釐鹽而玩歲僅活

其孽逮茲秋滿之初復起年饑之慮飛而控地志宜遂
于歸田窮則呼天心但祈于雨粟果勤洪造仍畀素餐
茲蓋恭遇皇帝陛下德本好生治先從欲體成周之歸
厚草木依仁法炎漢之用寬昆蟲咸懌肆紆臨昭施及
妄庸臣敢不奮厲愚衷激昂晚節枯魚未朽既均被于
斗升老馬載馳或粗知于道路

三任興國宮謝表

謫材無用祗退伏于田廬明命有加乃荐叨于祠館荷

天從欲揣分興慚伏念臣頃以戇愚誤蒙選拔典領三銓之重詎罄論思蕃宣兩郡之繁遽貽譏議一去闕廷之下六驚歲月之遷戴盆曷望于層霄徒懷卷遇伏慙自甘于末路倍費保全惟負郭之未充慨投簪之甚迫尚縻廩稍獲在安聞得象罔之珠益知味道受支離之粟滋愧匪功茲蓋恭遇皇帝陛下仁覆羣生春熙庶彙謂臣早更州縣宜罄力之浸愆憐臣久侍禁嚴亦姓名之屢記肆加存拊俾追飢寒臣敢不思報厚恩誓殫晚

節餘生未泯倘為尺蠖之伸素志僅酬或致寸莛之効
江東轉運判官謝表

竊食無功久尸於宰掾便私有請尚畀于使軺祇屆部
封具宣詔旨伏念臣零丁墜緒厯落凡材一趨君璽之
嚴五閱歲躔之換為郎甚寵乃官謗之自貽去國稍淹
迄州符之未試曲荷乾坤之造再瞻日月之光南省西
樞之聯曾微報効中臺右轄之屬荐至攝承揣分輸誠
拜恩從欲策名中秘之府錫節大江之孺地接行畿實

總陪都之調度跡違文陛重勤睿訓之丁寧此蓋恭遇
皇帝陛下天覆堯仁日躋湯聖衡持內外初無彼重而
此輕器使賢愚靡見寸長而尺短治厲精而匪倦功復
古之是圖致此妄庸姑從寄委臣敢不益堅素守無負
聖知雖攬轡登車未究昔人之志儻給軍轉漕或殫異
日之能

謝起軍轉官表

羽檄調兵僅供常職綸言錫命乃沐異恩悵懇避之不

俞第祇承而為愧伏念臣猥以頑冥之質誤蒙神聖之
知入侍禁塗豈有論思之要出分藩服曾何善最之稱
當周王田獵以選師仰漢帝璽書而賜郡元戎十乘奉
追召之既嚴次國二君觀驅馳而敢後亦妄陳于末議
竊自獻于愚忠深懼譴訶詎宜褻陟披肝瀝膽謂有願
之必從縮頸汗顏迄無功而受賞此蓋恭遇皇帝陛下
激昂士氣砥礪臣工陰闔陽開務作新于庶政乾旋坤
闢思底定于萬方致茲增秩之榮靡間尸官之濫臣敢

不欽承訓飭彌謹蕃宣躬阡陌勸農桑而布維新之令
修車馬備器械庶觀復會之期

謝除待制表

分符出守已叨便近之藩錫命寵行尚綴禁嚴之列懇
辭莫遂猥受彌兢伏念臣久以庸愚誤蒙簡拔周遊省
戶參掾屬者九年密勿從班備銓衡于兩選積有丘山
之厚戾了無塵霧之微勞外并名州實踰分願中聯美
職滋冒恩榮恍然未定之驚魂甚矣橫流之感涕茲益

恭遇皇帝陛下仁如天大德與日升器使羣材管蒞盡
歸于採掇生成庶彙蟲魚感遂于飛潛曲示眷私用光
臨遣臣迹雖違于丹陛名猶濫于清廂惟近臣獻納之
私未殫于補報若刺史中和之布敢負于使令

除龍圖閣直學士謝表

冒三銓之久長玷近班首六閣之聯遽叨美職思踰意
表愧溢顏間臣某誠惶誠懼頓首頓首竊以入從出藩
本侍臣之常禮循名責實斯主上之至權逮夫寵數之

驟加必有勞能之可紀仰河圖于東序是惟冠百世之
彌文通禁索之西清必以待一時之舊老如臣者少而
孤陋晚益顛冥符節屢頒久載馳于周道玦環遞賜悵
幾入于修門未酬神聖之知竊有滿盈之懼茲由常伯
自詭便藩綸命高華豈謂疏榮之特異奎傳炳耀殊非
避寵之能安此蓋恭遇皇帝陛下湯聖日躋堯仁天覆
察臣持循法令粗知課力之方俾臣宣布詔條曲示臨
民之渥顧此鸞鳩之質曷窺龍馬之光臣敢不祓飭懦

衷答揚隆施官雖外服尚司寶禁之儲名在諸儒敢忘
論思之報

權吏部侍郎謝表

服勤公掾濫一官四至之榮列職禁塗積十載九遷之
幸拜恩逾厚揣分奚宜伏念臣任本慕君學知為已守
高曾之規矩嗟涉世以自踈聞師友之淵源慨決科而
已繆一從縣宰誤玷王官蚤緣寢厯于省臺出入薦叨
於符節微軀欲奮幾成控地之鳩弱羽易摧屢作退風

之鷄剗憂患支離之後荷生成收召之殊兩轄重陪豈
有彌綸之效西垣暫直曾何潤色之工方虞未免于謹
訶敢意遽蒙于簡拔惟茲選部實異他曹內以檢制于
吏奸外以整齊于士類當劇煩而罔避匪庸懦之所堪
此蓋恭遇皇帝陛下天覆函生日熙庶政賢者在位而
能者在職舉無棄于羣材仕者欲朝而農者欲耕俾各
安于至化眷茲銓聚之職責其愚鈍之功臣敢不三沐
自修百為盡節若課吏期于平允可無銜鑒之功而從

臣許以論思尚切涓埃之報

除吏部侍郎謝表

典銓無補每懷代匱之憂拜命有加乃冒為真之寵伏
念臣愚不更事老無取材用意闊疎最出衆人之後秉
性樸直但期聖主之知自擢貳于銓綺實坐縻于歲月
威靈遠被僅揚使者之旌職業空居猶竊從臣之橐本
虞曠戾敢冀恩榮此蓋恭遇皇帝陛下丕冒寰區裁成
品彙謂上策莫如自治將內外以舉安思衆賢聚于本

朝故涓埃之咸取顧嗟庸懦亦在褒陞臣敢不仰體至
仁誓堅素履惟守資格而師法令罔敢怠違若殫忠蓋
而罄論思是為報塞

郊赦加食邑謝表

禮行效報初莫預于駿奔恩衍戶租乃重沾于惠術叨
榮逾厚揣分知慚伏念臣久去班聯尚尸祠祿材能素
蘊了無橫草之功齒髮寢彫第有守株之志莫致慶成
之善頌遂膺進律之殊褒駢邑既增取未興愧此蓋恭

遇皇帝陛下化參天地道通神明方萬歲以成純躬致
嚴禋之祀靡一夫之不被益均臣庶之歡申賁絲綸用
彰典禮臣敢不誓圖報稱欽佩眷慈縱觀渭上之朝詎
忘異日獨抱周南之病自信餘生

謝進封潁川郡王加食邑實封表

慈皇介壽霈及敷天微臣何功例叨進律仰止王言之
賁遽躋公社之榮伏念臣材不逮中愚無所用蚤蒙異
擢詎忘補報之階自取謗傷尚竊安閒之祿方舜治格

無為之盛乃堯齡臻難老之期千歲有逢萬邦胥慶錫爵遂超于五等疏封且冒于多田茲益恭遇皇帝陛下老老以興民君君而賦政盛禮備樂成儀煥于兩宮宥罪薄征懽聲溢于四表慨茲朽質曷副深仁臣敢不誓罄丹誠思酬洪造老當益壯况懷伏櫪之心用之則為益勵守株之志

謝加食邑實封表

臣某言伏准告命以明堂大禮慶成加臣實邑三百戶

食實封一百戶臣已望闕謝恩祇受訖者禮行泰室曾
莫預于駿奔賞逮羣工乃例霑于惠澤人微曷稱恩重
莫酬伏念臣久玷從班尚叨祠祿散材無用自甘屏跡
于丘園盛典有光豈復相儀于禮樂解澤既敷于溥率
歡聲實徧于邇遐未嘗趨造于朝猶蒙多與之邑茲益
恭遇皇帝陛下日新聖恩天覆萬方弗遺小臣欲賢愚
之並施爰有大賚俾動植以知仁臣敢不誓竭疲庸仰
思報塞三百戶而無青足增寒陋之華八千歲以為春

但祝聖神之壽

代賀南郊禮成表

泰壇修報寶厯迎長惠浹百神歡均四海恭惟皇帝陛下仁如天地德類祖宗年穀屢豐馨香薦于至治禮樂大備形聲協于泰和惟茲上帝之博臨式見聖人之能饗合樂允塞益顯從周之文並侑孔嚴光昭復禹之盛臣屬叨假節阻預奉璋聆熙事之備成惟深忭舞布詔書之寬大彌切欽承

代施資政謝靜江府到任表

擢從祠館就領帥符恩許自新顧馳驅而敢後榮踰始
望徒踟躕以自違已見吏民具宣詔旨伏念臣性資凡
陋術業空疎比叨預于政機迄無裨于國論老將老及
寧逃負乘之譏福過災生積有素餐之戾曲荷乾坤之
造尚寬鈇鉞之威竊食投閒慨驚魂之未定銜恩起廢
忱神觀以俱還惟茲八桂之封外控百蠻之壤奉琛而
內廟謨方事于綏懷剖竹臨邊闡寄益資于鎮撫豈翳

宸鉞可副使令茲蓋恭遇皇帝陛下大度兼容至明洞
照任賢而福天下邁成湯選衆之仁進德以尊朝廷廸
虞舜知人之哲洪啟同寅之治聿求共理之良臣敢不
仰體眷慈誓殫綿力雖聽風觀化未能追循吏之規而
省事清心亦足示遠人之意

代江南提舉范直閣謝到任表

千里造朝方蒙于收召十城命使遽玷于光華已屆部
封恭宣詔旨伏念臣起家寒遠涉世迂疎一昨蓮跡于

書林屢嘗賜對于便坐身逢聖主每懷造膝之忠意忤
權臣幾致反唇之罪三祈閒館兩佐遐州幸公道之復
開獲清光之再覩愚忠自勵雖知僅免于悔尤舊學寢
荒豈有發明于議論敢期齒獎曲賜眷憐寵之內閣之
名付以外臺之寄人微恩厚感極涕零此蓋伏遇皇帝
陛下懋建大中敷求至治乾綱獨運節萬務以鼎新離
照無私萃羣材而器使致茲庸瑣亦誤選掄臣敢不深
究貨源持平原政雖激濁揚清之事職所願為若奉公

守正之心義當無替

代劉給事謝復祕閣修撰致仕表

竊食真祠之逼桑榆之暮拜恩內閣遂榮田里之歸揣
已踰涯荷天從欲伏念臣奮身寒遠賦分竒窮從六藝
以決科僅而得仕接諸儒而奏技晚特逢時頃遊憲府
之聯獲冒書林之選螭蚴載筆嘗預記于王言鳳閣判
花復濫司于帝制進膺瓊闥數侍清光乃遽速于顛濟
迄自投于閒散鄉閭作供既閱十年香火無功殆逾數

任惟是衰殘之質寢登耄耄之期力已弗勝無復為駒
之意老將奚追徒懷化鶴之悲祇有布其腹心庶自乞
其骸骨豈期睿眷特賚殊私稍還論述之名俾識退休
之志義兼念舊恩出再生茲益恭遇皇帝陛下簪履興
慈蓋惟示軫欲曲全于小物肆紆照于容光謂臣麋鹿
之姿豈軒裳之是適憐臣犬馬之齒曾鐘漏之幾何許
以傳家尚為報國臣敢不効忠自勗守道勿渝擊壤而
歌唐虞預識豐年之瑞閉門而詠周孔益知化日之長

代徐侍郎謝宮祠表

典銓法從久懷竊位之羞賦祿真祠更遂養痾之請恩
輝適厚感涕何言伏念臣性本閎疎才仍淺陋早緣執
戟不為當路之榮晚預賜環最取衆人之後使北庭于
將變持漢節以僅還擢副民曹顧已亡于善狀易司吏
選曾不畏于多言徒知肝膽之欲輸豈謂筋骸之難強
衰頹彌甚疾發動者兩三災患相仍意不如者七八雖
際飛龍之運自甘退鷁之蹤尚軫皇慈曲從私志既假

珍臺之佚復聯書殿之榮此蓋伏遇皇帝陛下德合無
私功存善貸擴大明于日月獲望清光拯微命于風波
少安散地示蓋惟之罔棄俾棧且以知歸臣敢不益佩
弦韋自親藥石老馬或知于道路固絕望于馳驅犁牛
無用于山川第服勤于耒耨誓堅晚節靡墜素風

牋

太上皇后賀牋

臣某言伏覩詔書光堯壽聖憲天體道性仁誠德經武

緯文紹業興統明謨盛烈太上皇帝聖壽八十皇帝帥
羣臣詣德壽宮加上壽聖齊明廣慈備德太上皇后尊
號冊寶者聖皇紀壽益上萬年之期神母齊徽方隆四
海之養禮行當宁慶及敷天恭惟壽聖齊明廣慈備德
太上皇后殿下厚德承乾柔明婉日邁周郊之胥宇輔
成再造之功踰漢掖之練衣同膺難老之貺載申顯號
允屬昌辰日居月諸共仰西池之宴天明地察更占南
極之祥臣濫秩祠官阻趨魏觀觀大父母人倫夙正于

乾坤有聖子孫國祚永符于箕翼

皇后賀牋

臣某言伏覩詔書加上太上皇后尊號冊寶者慶集親
庭掩漢唐之盛事祥開壽厯紹堯舜之高年喜溢寰區
先生典冊恭惟皇帝殿下化行恭儉德茂慈仁肅陰教
于中闈會朝惟謹奉常珍于西內左右無違穆卜柔神
助成壽禮施于孫子嚴青宮而致綠車之遊燕及皇天
贊玉卮而集瑤池之上臣猥叨祠秩阻綴廷紳稱萬歲

之觴重霄在望仰三朝之會率土馳誠

代湯丞相母夫人賀中宮牋

迎嗣歲之嘉祥母臨萬國正長秋之顯號婦順兩宮喜
動宸闈歡均寰宇恭惟皇后殿下體參坤順德配離明
慶久襲于勲闕本塗山之自出譽夙彰于朱卨符媯汭
之來嬪果覲禕衣進膺寶冊奉燕禴之文韜宜百斯男
躬璽館之懿箱俟三之日妾叨榮盛際就養私庭王化
所基方仰自家而刑國人倫既正敢忘教子以事君

南澗甲乙稿卷八